



# La pasch, rumpeivla e buca remplazzabla

La stad da Glion ha envidau la dumengia vargada ella claustra dominicana a Glion al batten dil Forum per la cultura da pasch. Il segn da partenza per ina jamna intensiva cun dabia occurrenzas che tematischeschan il conflict e co prevegnir all'escalaziun.



**Bia tensiun e lunsch naven da conflicts. La presentaziun musicala da Vera Kappeler e Peter Conradin Zumthor da La Nova a caschun dall'avertura dil Forum da la cultura da pasch.**

FOTO ANDREAS CADONAU



ANDREAS CADONAU/FMR

Contribuiu al batten dil Forum per la cultura da pasch la dumengia vargada ella claustra dominicana a Glion ha era *Carmelia Maissen*. La presidenta communalada dad Ilanz/Glion ha menziunau en siu plaid da beinvegni la canzun dil trubadur bernes Mani Matter «Ds Zünhölzli». Il zulprin ch'arda e che dat giun plaun. Il teppi peglia fiug, igl incendi sederasa spert ed escalescha ella canzun da Matter ad in fiug che tschaffa igl entir mund. Mo tgei fa il protagonist da Mani Matter alla fin dalla canzun. El stezza il zulprin avon ch'il fiug pren surmaun.

### Prevegnir e stizzar

Tematar co stizzar il fiug ni silmeins co tgamunar in conflict avon ch'el sederasa ei ina dallas incumbensas principalas dil Forum per la cultura da pasch instradaus la dumengia vargada a Glion. Carmelia Maissen ha regurdau al federalissem e la democrazia directa dalla Svizra e sia finamira da porscher spazi allas minoritads da separticipar al dialog politic e da formar il mintgagi ed avegnir dalla Svizra. In dils motivs principals per la presidenta communalada che la Svizra ei prevegnida da conflicts pli gronds. Tenor Carmelia Maissen sacapescha quei buca da sesez. «Ei vala da tgirar cun premura las valurs svizras.»

### Dad in conflict a l'auter

Cun conflicts ei igl anteriur diplomat svizzer e president dil Comité internaziunal dalla Crusch cotschna (IKRK), *Jakob Kellenberger* sefatschentaus. El ei staus envidaus la dumengia vargada dil forum per s'exprimer a Glion all'avertura dalla stad da Glion. Neu da sia esperienza professiunala ha Kellenberger resentiu che la pasch ei fetg rumpeivla. «Ella sto vegnir tgirada.» Per Jakob Kellenberger ei l'Europa la regiun mundiala la pli pascheivla. Suenter numerus

conflicts eis ei reussiu all'Europa dad instradar cun l'Uniun europeica in project che ha impediui conflicts. Kellenberger ha menziunau sia satisfacziun dad esser sefatschentaus sco diplomat primarmein cun quei project da pasch. Ch'il mund ei denton lunsch naven dad in tal project da pasch ha Jakob Kellenberger buca mo resentiu sco anteriur president digl IKRK. «Jeu sai che la publicitad ei unfisa dils numerus plans da pasch universals che han purtau nuot.» Criticava ha Kellenberger las Naziuns unidas (UNO) bloccadas dils vetos continuai dils commembers principals dil cussegl da segirtad. «Nus stuein denton esser pertscharts che la situaziun ed ils conflicts fussen aunc bia menders senza la UNO.»

### Nova strategia per la claustra

Plidau all'avertura dalla stad da Glion ed involvada el batten dil Forum da pasch ei medemamein sora *Annemarie Müller* dalla cuminonza dallas dominicanas da Glion stada. «Fai dil bien ed untgescha il mal.» Il citad dad in psalm ha la sora dominicana menziunau per tematar ina dallas finamiras dalla cuminonza dominicana. Ina cuminonza che hagi stipulau ina nova strategia per la claustra da Glion en vesta dallas midadas che semuossien enteifer la cuminonza dalla Casa dalla sentupada. «Il Forum dalla cultura da pasch secumporta fetg bein cun nossas intenziuns.» Sora Annemarie ha engraziu als protagonists dil forum semess a disposiziun per realisar il vast program dalla stad da Glion. A quellas persunas engaschadas appartegn era *Lea Suter* che presidescha l'uniun purtadra dil Forum per la cultura da pasch. Ella ha annunziu da vuler purtar las finamiras dalla stad da Glion sur il cunfin dalla Surselva e da planisar a liunga vesta. Arrundau l'occurrentza han las presentaziuns musicalas da La Nova cun *Corsin Curschellas* al tgamun.